

本朝分省人物考

人物考卷之六目錄

北直隸河間府

劉敏

道同

呂淵

王翺

馬昂

李溥

李琚

程信

邊永

倪通

邊鏞

左鈺

于欽

強珍

張玉

陸珩

馬孔惠

吳正

戈瑄

馬中錫

朱瓚

孫博

張泰

戈孜

李粲

郝鑑

邊憲

周郁

李旦

鄭宗仁

王濟

馬恩聰

廖紀

屈伸

李咨

沈冬魁

房瑄

鄭璠附弟珩

張時叙

孫緒

李時

李銳

及宦

邊億

劉綱

于大節

馬政

牛鸞

殷尚賢

戴才

湯賓

宋諾

余繼登

本朝京省人物考卷之六

北直隸河間府

劉敏

劉敏字好學阜城人以孝行著洪武三年舉孝廉爲中書吏時暮以小車出龍江市蘆葦旦載於家而後入錄事妻以蘆織席鬻以奉母人或瞰亡以績帛瓦器遺其家者敏懸於梁候其復來竟還之爲楚相府錄事值中書以沒官女婦給文臣家衆咸勸其請給以奉母敏固辭曰事母乃子婦事何預他人及權姦事敗敏獨無所預人稱其有行識洪武十三年由工

部侍郎轉刑部特授通議大夫尋出爲徽州府同知卒于官

道同

道同河間人其先韃靼族也洪武三年以才幹舉太常贊禮郎十年出知番禺縣性剛毅廉潔番禺素稱繁劇而軍衛尤強橫需求百出佐吏動遭笞辱前令不能堪比同至視民如子民亦愛之如父母堅執公法凡事違理者一切以法從事由是民賴以安權要惡之未幾永嘉侯朱亮祖至數以威福撼同同不爲懼時有土豪數十人遇閭里珍貨輒抑價買之稍不

如意卽誣以鈔法人莫敢誰何同廉問得實捕其首
悉械繫通衢以令衆諸豪詣亮祖求辯亮祖召同勞
以酒食徐爲言之同厲色曰公爲大臣不當爲小人
所使亮祖不能屈次日亮祖竟破械釋之又有富民
羅氏納女於亮祖其兄弟因怙勢凌人同按法重治
亮祖奪去反借他事笞同同遂歷數其事而奏之疏
未至亮祖亦誣同抗訕先聞上不知其由先命使
取同首級適同奏亦至上以其職卑而直言大臣
有骨鯁風特遣使宥之二使同日繼至而同已先死
邑民甚悼惜之同性峭直器宇魁岸奉母備甘旨與

妻子同粗糲布政使徐本雅重同嘗按一醫士罪當笞本急欲得醫遣卒語同釋之同曰徐公亦效永嘉侯耶笞之乃已後同卒於官縣吏有奉其主於家者出入輒告有事卜之輒驗人或以爲神云

呂淵

呂淵其先涿郡人曾大父靖元福建路總管大父榮宗詹事府詹事父及至正甲午進士韶州通判永樂初徙居任丘淵承祖父儒業積有雋才由薦辟主事刑部時遠夷多反側上假淵以鴻臚卿往兩諭占城兩諭日本渠魁莫不心服旣歸錫予甚盛爲員外郎

未幾國方營建甚峻又命督材川廣處置得宜

王 翱

王翱字九臯滄州鹽山縣人翱生而岐嶷與凡兒不
類甫十歲讀書一二過輒成誦父嘗戒曰庄家勤苦
有飯吃秀才勤苦有官做翱惕然自勵潛心經史志
期古人永樂乙未中二甲一名改翰林院庶吉士甲
辰授大理寺左寺正讞獄公平爲兩法司所敬憚因
註誤左遷行人宣德丙午楊公士奇薦爲山東道御
史陞右僉都御史正統丙辰奉 勅鎮守山西剛果
孤介去華就實植良善抑奸貪風采凜然官民畏愛

戊午奉

勅巡鹽浙江事竣還已未四川松藩番賊

爲忠

命將征之勅奉

勅叅贊軍務威聲大震賊

懼率所部來降勅以

上所賜白金寶鈔易羊酒犒

勞之酋首商巴等感悅盡邀各部落生番一十八寨

來歸受約束地方獲寧辛酉奉

勅鎮守陝西整飭

關隘操練兵馬舉用將帥三邊晏然關中以治羌戎

莫不服其令壬戌遼東邊務弗緝虜寇頻侵累失機

宜 朝廷深以爲憂特

勅勅提督遼東軍務面諭

以便宜行事勅至前屯總兵以下庭謁勅命斬失機

者若而人哀請得免三軍股慄莫不用命至廣寧自

山海關直抵開元高牆垣深溝塹五里爲堡十里爲屯烽燧斥堠珠連璧貫千里相望簡閱行伍懦弱者更之貧窮者賑給之鰥寡者婚配之凡詞訟無問重輕量情以布綰穀粟贖罪雖人命亦以物抵償其家有指揮孫璟者因漏關鞭戍卒身死其妻與女哭之俱死他卒訴璟殺一家三人勦判曰某死以罪妻女死於夫與父非殺也令璟償其埋葬之費得無累卒爲名將焉癸亥九載秩滿陞左副都御史時母喪上疏乞歸守制降勅奪情命率官軍征剿達虜斬獲首級人畜無筭捷奏賜勅獎諭陞右副都御史尋

又以前功陞左都御史是年也先犯京師以數萬寇廣寧時翱方給賞軍士且戒約三軍爲禦虜計不意虜騎卒然突至我軍大潰翱亟歸坐城下收拾散卒堅壁固壘間有謂城不可守以惑衆者翱怒勒劒示衆敢有異謀者斬徐俟虜退選精銳分途四出或奔其前或躡其後或衝擊其左右賊不得息遂遁去翱在邊十數年設法處置積銀萬餘兩糧數萬石馬千餘匹邊用充足器械鮮利軍士飽煖人樂於戰所舉總兵叅將如施聚焦禮輩自儔衆拔起皆智勇有統馭才爲夷狄所憚近邊建州毛憐及海西諸夷來則

厚以款待去則嚴加隄備老少男婦莫不感翺之恩而畏其威景泰三年壬申勅取回京管都察院事尋加太子太保兼都御史值廣東廣西不靖鎮將皆庸流地方大擾命翺總督兩廣軍務得以便宜行事翺略去兵威一意推誠撫諭其酋長向化者犒以金帛酒食多見歸順思恩軍民府知府岑英有疑其反側者翺居之桂林城中禮待甚厚更恩養其士兵由是人思効力思明知府卒同族黃震黃道爭襲而道父兄皆死於兵翺憐之奏以道知府事慰其家被禍之慘一時帖靜叅將范信有才略兵部因事革職

翺不惑羣疑奏復其官信卒以能將名兩廣者十餘
年癸酉 欽取回京遷吏部尚書太子太保如故乙
亥上疏乞致仕不允 詔命有司爲翺起第於縣郭
之西時冢宰泰和王文端尚在位而選法一委於翺
於是洗剔垢弊嚴考察公銓注抑倖進杜請托故事
官吏給由起復文憑過限多匿乃行覆勘法而奸人
不得爲計往臨選以硃書下緣爲奸糊塗莫辨翺易
以墨弊遂絕 英宗復辟翺累乞致仕不允時有欲
傾陷者賴 上素知之得無事九月以翺在邊效勞
特官其子竚爲錦衣千戶適內閣李公賢以事黜補

外任欲用翺翺力辭薦岳正以代賢尋謫去復請還
李賢於內閣 上篤信之眷愛加隆 賞賜金玉束
帶綵幣玩器等物歲無虛每用人必訪於翺翺亦以
用賢報國爲已任翺未嘗使人知以要爲已功必曰
朝廷用人豈若小丈夫汲汲沽恩弔譽待人求而後
與哉 上嘗召翺與李賢等同遊西苑及晚宴醉
命人扶還南城五花樓成 召翺落成上元節 賜
觀燈於 武英殿燕賜優渥每引選人奉天門或遇
雨雪 命中貴扶而上下之有所遊幸 召翺與俱
宣傳侍郎選官翺遊畢雖晚必蒞閱所選訖放榜惟

恐有未當也辛巳曹欽反夜執李賢於長安砍傷其
首奔翽卧所賊併執翽翽曰 朝廷何負汝汝乃反
耶殺他人寧殺我賊素畏服翽因謝曰豈敢殺長者
耶遂上馬去李乃得釋事 聞加太子少師癸未乞
致仕不允成化改元復乞致仕 上諭以爲朕勉留
任事只朔望朝叅仍加太子太保榮祿大夫丙戌翽
有疾懇疏辭歸不允三年復疾乞歸 上遣御醫來
視七月疾益篤上疏懇乞骸骨歸 上勉從所請褒
賜甚渥甫欲興疾出關而病不能舉矣卒年八十四
訃聞贈太保謚忠肅予九祭造墳安葬給舟車送還

其鄉翺高邁孤峭人不敢干以私鎮守遼東還朝饋遺一無所受某太監者與同事久持明珠數顆餽之固辭某曰公於他人之餽皆不受我之餽亦不受耶有死而已翺不得已受之乃自綴於衣領間卧起自隨雖其妻不知也居數年太監死其猶子以貧不敢見翺使人召之曰何不買第宅曰貧不能也翺曰第買之其人訝不肯買翺乃解其珠出之衣領間與之值可千金買第尚有餘也爲吏部尚書仲孫以廕入監將應秋試以有司印卷白翺曰汝才可登第吾忍蔽之哉如汝誤中選則妨一寒士矣且汝有階得仕

何必倖冀非分邪裂卷火之又一女嫁爲畿輔某官妻夫人甚愛女每迎女壻固不遣悲而語女曰而翁掌銓遷我京職則汝朝夕侍母且遷我如振落葉耳而固恡者何女寄言於母夫人一夕置酒跪白之勦大怒取案上器擊傷夫人出駕而宿於朝房旬乃還第壻竟不調其公執如此

馬昂

馬昂字景高其先河南祥符人後移籍河間之滄州永樂癸卯登鄉薦明年會試下第入國子監宣德丙午以儀容俊偉聲音宏亮授行在鴻臚寺序班正統

丁巳用廷臣薦陞監察御史奉命整飭宣府大同偏頭關兵備及巡按陝西淮楊徽州等處所至有聲癸亥行在刑部獄禁失嚴囚因刼獄逃竄尚書以下咸禁錮跡捕乃陞昂右侍郎未幾改右副都御史叅贊甘肅軍務時叅贊都督王喜玩寇失機昂至劾其罪謫戍遼東官軍畏服先是赤斤蒙古罕東等衛番族恣肆鈔掠至強刼總兵進貢馬駝昂受命帥將士討之盡得主名梟示及擒其僞祁王鎖南奔并妻子械送京師自是番人不敢近邊已巳北虜寇甘州昂令人畜悉入城堡簡精銳選騎射躬擐甲胄出屯山隘

以伺虜聞遁去西邊方倚爲長城而昂以乞疾忤旨
乃命致仕景泰庚午也甲戌兩廣夷寇擾攘起昂總
督兩廣軍務兼巡撫便宜行事昂乃大布朝廷威
德帥總兵方岳并土官兵民剿其爲暴害者生致其
僞將軍周鐵盛盤等獻闕下上遣行人勞以綵幣
寶鈔陞右都御史丙子征斗峒賊平轉左都御史天
順丁丑有不足昂者造謗上命致仕及入見復留
命之山西巡察邊境比還遂理院事戊寅陞兵部尚
書辛巳虜寇陝西勢甚急命懷寧伯孫鏜爲總兵昂
仍總督刻日出師是夕曹欽反昂與鏜討之欽伏誅

進太子少保仍掌兵事自是 上寵待特厚賞賚以
金玉束帶繡金麒麟服其銀幣玩器書畫禽鳥時鮮
之賜歲無虛月衣有號撒哈喇者雖勲戚有不可得
昂與賜焉屢召遊西苑南宮及扈從校獵南海子一
時進退廷臣亦必召昂咨訪甲申 憲宗嗣位信任
益篤調戶部尚書尋奉勅同右都御史林聰給事中
潘禮陳越按籍點軍士旣畢乃分精銳者爲十二營
以備調用又籍軍帥之賢否而黜陟之慮後事之違
變而禁約之實皆出其議云戊子昂年七十時有災
異謫見力求退避得俞旨賜勅榮之陞辭復賜譙餞

并寶鈔若干既歸八年卒訃聞 上嗟悼贈少保謚
恭襄

李 溥

李溥字文博號約菴任丘人生而神慧稍長自能課
學不煩指諭固安學諭劉公輓明易學溥往從焉劉
公器之妻以女劉卒溥扶櫬西歸鳳翔竭力管葬且
曰鳳翔卽吾土也因補鳳翔學弟子員宣德七年舉
陝西鄉試明年試禮部中乙榜遂就巴陵訓導嚴科
條勤獎誘士多登顯科正統八年陞懷仁藩府教授
秉禮抗義動裁以正奏改山西高山衛繼除延安復

除順慶復左遷泰安州學正成化中解官溥豪爽雋
毅博洽善爲古文以易爲任丘經學倡尤精于象緯
星曆諸書人皆比之康節官六任凡四十餘年清苦
如秀才時誨人必先忠孝故所在咸有聲稱子棨孫
時俱貴顯贈溥如其官

李 琚

李琚字崇璧鹽山人天性孝友以弟子員充貢入太
學卒業甫基擢戶部雲南司主事尋調廣東司正統
甲子冬陞郎中復用薦進階奉議大夫在官凡卿貳
有所商確若國用之贏縮邊儲之豐耗與夫兵民之

轉輸從中贊之議論允當有裨於國計者甚多時河間民有部運租稅者以白金若干遺家僮而道其姓名竟趨去踞走白卿貳召其人笞而還之生平清介大率類此

程信

程信字彥實其先徽州府人祖社壽洪武間謫居河間遂隸籍河間衛信中正統辛酉順天鄉試明年第進士授吏科給事中己巳英廟北征偕廷臣上疏諫止不報已而師潰土木虜遂南侵京師戒嚴命守西城上言五事曰新號令以振軍威募勇敢以備警

急召勤王以遏南侵設武備以防內變養銳氣以備
戰守皆見采納虜首先自西山一帶進薄都城都
督孫鏜禦之失利乞領衆入城信堅不可躬督軍自
城上以火鎗礮石鼓譟爲鏜援虜引去景泰紀元命
充副使持節冊封華陽王凡王府有饋遺悉却之歸
陞右給事中辛未九月 英廟還居南宮復上中興
固本十事曰敬天求賢納諫謹災節用詳刑選將練
兵尚儉隆師而敬天一事則當時天象屢變請 景
皇帝隆孝友之實以答天心之仁愛聞者壯之壬申
陞山東右叅政總理遼東糧餉時巡撫都御史奏管

倉官吏卒盜糧幾石以上者死乃造新斛視舊加二寸付信信立碎而火之曰使彼真盜死不足惜今故爲此斛置人于死地豈情也哉遼卒至今能道其事會以憂去轉四川分巡所至問民疾苦松藩夷人作亂偕侍郎羅綺進攻破其黑虎諸寨天順丁丑英廟復辟奉表入賀時方錄景泰間上言之人遂留爲太僕卿二年陞巡撫遼東左僉都御史遼守將海寧伯董興姻聯曹欽信一切裁之以正又造戰車創義倉行贖罪法設月輪簿凡百號令一新建州夷酋董山潛結朝鮮乃使土官佟成授之以成筭往廉之得

朝鮮授董山中樞院使制書以還上疏曰乘其未發
急遣二使問之可伐其謀朝廷廼命一給事往朝鮮
一錦衣譯者往建州西酋不肯承出制書示之咸相
顧愕然各貢馬謝罪虜酋孛來聚衆欲入寇自率師
巡邊營于境外者凡三月得風濕之疾都指揮夏霖
事多不法與董興相結納僉事胡鼎按其罪四十條
具以狀聞 詔中官及錦衣衛指揮逮霖籍之不意
中途受賂乃奏虛實相半都御史寇深因劾信輕聽
胡僉事言調南京太僕寺少卿五年召陞刑部右侍
郎尋以憂還河間 憲宗卽位起復兵部又轉左侍

郎成化丁亥四川貴州都掌蠻賊據大壩箐之險破
合江以上九縣勢甚猖獗陞信尚書提督軍務與襄
城伯李瑾統番漢兵討之信至永寧自督大軍入金
鷲地又分四路兵期會于大壩將士依其方略用神
銃勁弩攻賊不能支連破二十餘寨獲銅鼓數十斬
首五千級生擒二千餘賊復走入深洞又命軍士以
土石塞其門以兵圍之月餘賊死洞中臭聞十餘里
又陰察九姓土獠之附于賊者還師撲之未及一載
都掌悉平又布置衙門以定邊防凱還進兼大理卿
有白金綵幣襲衣之賜前此營大壩凡兩月淫雨不

時瘴癘洊興舊恙復作至是四上疏請老俱不允辛卯春上以雨雪不降求言上言兵事可更張者四兵弊可伸理者五詔下所司執政者難之未幾三邊有事悉如所料應城伯孫繼先多不法事覺有

詔下信多請貲之者信執筆奮然曰侯伯乃武臣領袖懲一戒百正在于此遂盡發其貪剋諸事繼先坐免黨與皆謫戍嶺表軍府肅然又北虜潛伏黃河套中歲爲西患輔臣有請興師十萬以大同守將楊信爲總制搜剿之信力言河套地曠遠無水草興師十萬則餽運者加倍自古禦戎來者拒之去者弗追此

不易之法而楊信亦止請三萬人巡邊禦敵信曰此舉繫國勢之強弱以三萬人搜套則少巡邊則多且關隘連歲受兵今此之往勝形未具而先自困豈謀國之道衆服信言卒與二萬人巡邊而罷搜套之議七年南京缺叅贊機務大臣交章薦信及至南京適彗星現乃與六卿合議復上言興利除害三十餘事多見施行他若汰貪縱修舊典可書者尚多四載復疏乞休上重違其志賜勅還鄉明年還休寧里第又四年卒贈太子少保謚襄毅壽六十有三信儀觀魁偉性資剛果六籍諸子無不涉獵爲詩文略不經

意而雄渾可傳事親孝少時力耕以養居憂廬墓側
有芝產之瑞教子弟嚴而有方待內外親族恩義兼
盡遇故人子矜恤振拔惟恐不及凡百玩物不以掛
目爲諫官知無不言言必達大體而疾惡大嚴佐兩
藩及法司必以敬慎方正輔其長不隱忍坐視以爲
賢掌兩京兵政及征伐俱有成績又能任怨南京守
臣或欲預錢穀詞訟信曰叅贊機務所以謹非常若
此乃有司之事也論者以爲得體征川貴時詔以便
宜之權付之自祭兵至凱還不爵一人不殺一人同
事者爲言信曰刑賞人主之大柄懼聞外事不集而

本朝夕夕ノ生才 卷二 一四 陳士儒
假之人若幸而事集又竊弄之豈人臣之道耶論者
又以爲此古名臣之心名臣之言可以爲後世法號
晴洲釣者有晴洲釣者集若干卷藏于家

邊 永

邊永字仕遠任丘人父復初當 太宗靖難時率鄉
人歸附屢立戰功授世襲百戶永少業儒不恃廕廢
學領正統辛酉鄉薦乙丑成進士拜官行人景泰庚
午使安南王率其臣館次迎謁將拜於階上永正色
責之曰外藩名知禮義者惟安南與朝鮮耳今傲慢
若此禮義安在衆皆矍然退拜階下壬申使占城其

國風俗鄙陋夷情狡詐永待之以誠接之以禮國中
敬信哈密入貢還永驛送其人至甘肅禁制有方供
應取具外俾無得侵擾州縣其人言於甘肅守臣曰
哈密入貢且十三次矣館伴之使未有如邊公者天
順間請 楚府行祀禮先是每祀用白金百餘兩永
閱得其實減浮費十七八後復詣 代府行喪禮閱
實減費如在楚時或謂此有司常事無庸更革者永
曰大同地極邊民困殊甚一祭祀之需省銀若干糴
粟實倉廩遇饑歲可活若干人奈何仍舊弊乎平生
所至若河南山東陝西雲南足跡殆半天下未嘗少

通賂遺人稱其廉介秩滿陞戶部山西司員外郎丁外艱服闋復除戶部貴州司督餉臨清時同事者中貴四人咸怙勢肆虐永一以直道處之不激不隨而出納有條宿弊寢革民甚賴之成化戊子引年致政歸甲辰病不起春秋八十有一子鏞孫憲皆爲名卿而俱及見其貴固盛德所致也

倪通

倪通阜城人正統辛酉舉人筮任刑部主事陞陝西屯田僉事自玉門抵沙漠屯田甲於他省租負幾百萬而實爲豪姓所扼通至奏劾之置於獄不半歲而

負者報完矣未幾丁外艱銓曹扣其闋期補山西僉事擒僭號糾貪濁凜凜風裁人不敢干以私尋以疾乞致仕歸

邊鏞

邊鏞字克振任丘縣人父永登正統進士仕至戶部郎中童丱時隨父官京師勤苦力學寒暑無少間識者器之已巳北虜犯順近京之民多挈家走避鏞毅然不爲動從之者頗衆已而竟無事於是愈益器重焉長從秀水呂學士原明書經領景泰癸酉鄉薦累試春官不捷卒業太學選拜河南道監察御史在職

二年繩愆糾繆大著風采嘗按南畿馬政淳安商文毅於戶部公爲同年時召起於家道遇之見其行事大加稱賞成化丁亥建州夷爲亂武靖伯趙輔等將兵往討命鏞監其軍持法嚴明軍行千餘里少有犯者抵遼陽分五路而進鏞居右腋適當勅敵斬獲復多師還八年以功遷南通政司右叅議南京散地人咸爲鏞稱屈而鏞不以爲意益慎厥操視御史時有加焉戶部公聞鏞遷官卽引年致仕鏞在南京馳慕益切所得俸祿卽寄歸爲養未嘗自私十六年九載滿遷南京大理寺少卿 召爲通政司右通政未行

以內艱歸事戶部公曲盡子職鄉人稱其孝十八年
服除仍爲通政領武職 詔勅二十年用薦陞都察
院右僉都御史巡撫山西地方兼提督鴈門等三關
同事者或以他事干沮鏞正色曰吾謬當倚用惟知
守法而已屈法以市恩誓所不爲聞者悚然踰年虜
寇大同乘勝至關下關兵力不能支甚有懼色鏞奮
然督命據險設伏以待之虜至伏發不得利而去關
南地方得免虜患未幾戶部公卒鏞歸葬舊例僉都
御史四品止有祭 朝廷以鏞在邊有功併 賜以
葬服除弘治二年遷左副都御史管院事嘗上時政

十有五事言皆切直 朝廷嘉之下有司議行三年
改南京刑部右侍郎抵任甫數月遂引疾乞致仕既
得 命卽歸屏歸墓所杜門謝客非慶吊不入城市
遇忌口哀慟如初喪得食品美味必聚諸昆弟然後
食遠近親族婚喪貧不能舉者賙之弘治辛酉卒年
七十二

左 鈺

左鈺字廷珍先世山西沁州人永樂初以貲財饒于
鄉奉例移阜城遂家焉鈺少以穎敏魁兒輩少長游
邑庠景泰癸酉領順天鄉薦成化乙酉以急缺風憲

銓司於鄉進士中選老成及學行卓越之士鈺遂拜
監察御史丙午督理兩淮鹽法豪強斂跡而鹽有餘
課己丑按福建風紀丕振八閩迄今有真御史之頌
壬辰陞陝西僉事 勅令協守懷慶等地方討賊有
功 上有銀牌表裏之賜時韓王取假子自紹事敗
連歲不決鈺一訊得實時稱其才己未陞本司副使
戊戌討岷州叛虜捷至加支從三品俸壬寅陞按察
使癸卯陞右僉都御史巡撫遼東甲辰調大同撫馭
有方邊地賴以寧妥乙巳以中外推薦佐管都察院
事未幾奉 命巡撫山西提督鴈門等關有寶鏹金

織之賜尋疏乞致仕家居二年以疾卒

于欽

于欽字政恭交河人偉貌美髯外雖負氣岸而中甚坦夷蚤游邑庠肆力問學作文不事葩藻一惟理致是歸登天順丁丑進士擢吏部文選司主事勤慎自持事無苟簡時太保王忠肅翺掌部事嚴重馭屬不少借詞色獨善欽同官亦多其才且賢由是聲聞勃興三載陞署員外郎成化壬辰卒

強珍

強珍字廷貴滄州人成化丙戌進士初知涇縣奏減

賦額人爲立祠擢御史負氣敢言嘗按甘肅及江北諸府人凜然畏之按遼東會權閹汪直挑釁債事時無敢論者珍獨上其罪下詔獄撻辱備至謫戍遼東三年有旨復職致仕弘治初起爲山東按察司副使未幾陞大理少卿遷右僉都御史巡撫宣府坐言官論列召還改南京右通政以母老乞歸弘治十八年八月卒珍性強鯁政尚嚴刻所至有風采爲時所重

張玉

張玉吳橋人成化丙戌進士任監察御史正色立朝權貴歛手尋按關陝進廉去貪風裁振肅六年陞浙

江按察使僉事九年陞福建副使未幾轉本司按察使復起陞左布政使閱十餘年凡盜賊之隱伏人民之誣罔謀逆之不軌征徭之不均爲所摘發裁革損益者至夥弘治七年以薦進順天府尹時民方困於征輸玉廼條陳其利害上之事下廷議皆聽之遂以爲例計歲減數千萬緡居者安堵流離者復業丁巳巡撫遼陽謹斥堠嚴烽燧敦信義軍士以守備爲本而不言攻戰有徵求以希爵者正色厲言拒之戊午進階一級庚午乞骸骨然中外方倚重留之愈懇而辭之愈堅竟以致仕歸

陸珩

陸珩阜城人成化己丑進士任南京刑部主事郎中
歷西安福州知府所至皆有聲轉陝西岷洮兵備副
使夷民畏服尋轉江西按察使湖廣右布政廣東左
布政居官平易近民惠政逮下晉應天府尹致仕

馬孔惠

馬孔惠字孝卿東光人成化壬辰進士初授兵科給
事中歷轉都給事中剛正自持彈劾不避凡所條陳
多裨時政以諫中官忤旨左遷福建布政司叅議

吳正

吳正字以時交河人研窮經史朋儕中咸推服之成
化辛卯領順天鄉薦會試得乙榜入監造詣日闋以
肆銓司簡在首選授鎮江府通判持已廉謹蒞事明
決其待士也謙而有禮其治民也恩而有威專督水
利若京口閘虎踞橋督併修葺往來便之下至河道
岸圩之類壅者疏之廢者補之坂垓者剗除之用是
漕輓無滯車戽有源人爭誦焉秩滿六載乞歸旣去
人皆思之比之何武云

戈瑄

戈瑄字良玉別號蓼溪其先浙江嘉興人曾祖諱惟

善永樂間坐事遷河間之景州家焉瑄成化辛卯舉
於鄉乙未登進士授河南嵩縣知縣先是嵩多逋稅
又礦徒不時發瑄謂此不可以急治也乃寬徭役廣
措置專務以德化民視歲之豐凶爲補徵之多寡積
數年逋盡償民賴不罹於罪政暇輒躬巡近礦民居
諭以禍福使得自新礦患亦稍稍息邑人歌思之辛
丑召爲廣東道監察御史督通州倉剔抉宿弊癸卯
以父喪去位服闋復除廣東道監察御史會 萬妃
怙寵率同官上章論之 憲廟震怒撻之午門或尤
其戇瑄曰進言受責何辱之有復上疏獨論不報丙

午巡按南畿弘治初年命刷南京文卷所至著有風
裁以繼母喪守制癸丑復任推掌三法司事甲寅陞
四川按察司副使重夔保順等地多盜負山出沒瑄
至明約束布威信雖偏鄉僻邑必躬臨撫綏召父老
諄諭之俗爲丕變又奏請於湖陝出入之地若利州
施州等衛宜統於一庶可責成 上從其言令易勅
行事蜀人乃安壬戌陞山東按察使剖決滯獄囹圄
爲空歷城人有兄弟異居者弟盲人也置肆酤酒頗
獲利兄嫂屢嫉之弟憤恚自縊弟婦奔告其兄併其
傭縛之遂乃以謀殺親夫愬有司鍛鍊獄成婦及傭

誣服瑄至鞫之云其夜有二軍主於其家宜知狀趣
二軍對區別研審得其情坐兄嫂以罪弟婦及傭具
釋人以爲神乙丑陞浙江右布政使正德丙寅轉江
西左布政使丁卯陞南京都察院右副都御史戊辰
改都察院左副都御史時丹山屠公掌院事瑄佐之
有所執論屠公輒欣然稱善嘗奉 勅清查牧馬草
場辯疆界嚴條約不爲權勢怵時劉瑾專政疾其違
已追論浙江布政時事罰米七百五十石再陳休致
不允改南京大理寺卿庚午陞南京刑部右侍郎辛
未改刑部左侍郎奉 勅勘岷府事賜羊酒寶鈔壬

申陞南京右都御史掌院事甲戌陞南京刑部尚書
乙亥三年考績上疏乞休不允已卯考六載滿復懇
乞骸骨乃得所請瑄旣致仕優游山林鄉邦宗族每
欣然相遇視其言動以楷式處兄弟待寡嫂撫孤侄
曲盡恩禮婚喪有弗舉者輒助之會上兩宮尊號
詔進階資德大夫未幾卒

馬中錫

馬中錫字天祿故城縣人早慧三歲識字七歲能賦
詩父處州爲唐府長史以直諫忤王械送京師
并姚淑人皆下之獄中錫以幼免訴辯如成人部使

者感動詣 王曉譬家得釋復依母趨京訟屈事卒
得白年十六游邑庠成化甲午舉鄉試第一明年乙
未中進士丙申拜刑科給事中時 憲廟萬貴妃之
弟恃寵驕恣上疏發其奸語過直被杖幾危再疏再
杖不爲沮悔公主侵畿郡民田被命往覈以其田還
民中官汪直梁方怙勢橫甚又劾其不法數事直喉
邏卒日訶其門竟無所摘然久不得遷也旣滿考僅
陞雲南按察司僉事尋丁外艱服闋改陝西其督饒
於延綏也革分司沿舊私用之銀三百餘兩弘治己
酉主鄉試錄文多出其手太宰王恕奇之改提學副

使嚴條約慎章程士習以振壬子陞大理寺右少卿
留都守備中官蔣琮屢興大獄中善類遣官廉問至
再俱爲所制乃以屬之中錫不事刑威第以言誘致
其黨抵琮於法乙卯陞左少卿奉 命閱實居庸紫
荊倒馬諸關事竣有羊酒寶鏹之 賜丙辰陞右副
都御史巡撫宣府自鎮守以下私役頗多首革行臺
雜匠百餘以倡之軍伍復實數總兵馬某及監搶叅
將之奸三人相繼罷去又以居庸爲南北襟喉榆林
大同諸鎮貿遷餽遺往來雜沓請於巡撫行臺給掛
號如後府式以防奸宄出入之弊在鎮三年嚴禁例

杜請託凡芻糧工匠馬匹之利舊爲世家所擅者悉歸之官乙未二月北虜擾邊督兵斬獲甚衆捷奏

賜白金文幣三月以疾得請邊人叩關願留 詔病

痊亟用居家七年足不及官府治園亭挾親舊日以觴詠爲樂若將終身焉而廷臣論薦不已前後凡十有三疏乙丑 武宗卽位起巡撫遼東諸勢家舊占屯田之便利者至數百頃且歲役官兵代耕屯卒所受虛張冊籍實皆磽瘠之地又代爲勢家輸稅遼人苦焉上疏取便利田給卒其虛籍盡除之太監朱某開客肆擅馬市厚自封殖武職效之肆爲侵牟亦各

有錢行魚戶識字頭目諸稱悉裁以法且疏朱監之
姦抵其左右以罪人大懾服正德丙寅六月 召還
陞兵部右侍郎未幾轉左逆瑾方用事有朱贏者其
心腹也冒邊功槩陞牽連數十百人脅兵部爲之覈
請大司馬旣許之矣中錫曰如冗員日增邊人解體
何哉卒據實上請事得已而瑾銜之十二月矯詔改
南京工部左侍郎尋罷其官瑾怒猶未已也丁卯十
月使遼覈芻糧者以腐損過多希瑾意罪歸中錫逮
下詔獄瑾必欲以死處之戊辰三月械繫遼東尅期
償所負計當用銀數千東人聞來爭出迎願代輸者

襁屬中錫曰此適足重吾辜耳固謝之有司承望迫乃盡鬻田廬復稱貸以漸償之衆爲憤鬱無所泄適瑾黨戶侍韓福覈屯田抵遼盡稅中錫所除虛籍以投瑾好衆憤益甚已巳二月廣寧卒數千登城夜呼欲爲變戶侍怖且窘人告之中錫偕獄吏登城大呼曰我馬某也今在此汝輩擾擾何爲衆以中錫故遂解去歲餘償完猶褫職爲民庚午九月瑾誅復起巡撫大同諸所興革如宣府遼東時宗室有邀去任郡倖而奪其資者中錫廉知疏請坐罪竟還所奪威名赫然方瑾之未敗也人苦苛征四方盜並起機伏

繫結爲日既久而人不敢言其後瑾雖敗露而亂勢已成不可猝遏辛未春霸州盜魁劉七楊虎等擁衆抄掠山東河北遠近騷然上乃召爲右都御史授鉞往督軍務固辭不允卽兼程而行與賊戰於彰德又追奔至泊頭鎮皆敗之前後斬馘甚衆賜勅獎勵陞左都御史掌院事寇奔入山西數月復還有衆數萬我軍勢不能遏七月圍棗強中錫調叅將宋振撫其前而自引兵躡之振與所部兵皆怯鬪不敢前戰及棗強陷令以下死者近千人中錫提孤軍止七八百人知進戰決無成功乃便服單車從數僕直抵

寇壘 諭以 朝廷恩威具開其自新之路寇感泣
橫刀誓水願丐餘命奏 聞廷議遷延未決劉七潛
使人至京師探諸中貴無招降意遂復縱兵焚掠中
錫以老師玩寇被劾徵下獄久繫未釋明年竟以疾
卒於獄年六十七御史盧雍追頌其冤謂賊實聽招
而僉事許承芳忌之密請益兵以疑其心後雖更受
中錫約束而徵入之命下矣 朝廷是其言予祭一
壇中錫耿介孤峻不肯以私干人遊宦四十年甘守
寒儉終始如一日遇事敢任不遑他恤平生問遺未
嘗及權貴于其不法者又輒加裁抑故所至多與物

忤其處鄉鄰親識亦嘗過矯惟恐廢法用是聲稱雖著而不能彌少恩之謗其事繼母處兄嫂及撫孤侄能曲盡孝友族人老而貧者廩之終身家法嚴整雖宴集無敢狎例當蔭子家人欲徇俗陳乞乃正色謂之詎宜爲子而稱乞乎酷嗜讀書自爲諸生時日取經史百氏博觀而詳玩之應務之隙未嘗虛廢晷刻爲文有雋才刊落凡近士類喜傳誦之旣入仕益橫逸奇崛於詩尤工評者謂其體格早類許渾晚入劉長卿陸龜蒙間藏於家者有入秦棘寺上谷廣丘遼西雲中東征諸稿甘陵志箋經寓意諸作

朱 瓚

朱瓚阜城人登成化乙未進士出知襄城縣政尚嚴明以薦陞監察御史剛直敢言多所糾劾人皆憚之遷山東副使未幾復遷福建按察使風紀肅清吏民畏服尋陞湖廣左布政除姦革弊綜理周密累上章疏裨益弘多歷官三十餘年清介自持始終不渝及致仕杜門謝客人少被其容接焉

孫 博

孫博字約之景州人倜儻有志節通毛詩博極羣籍尤精語孟酣飫沉潛著爲論說深得聖賢之指諸儒

競傳誦之領鄉薦爲歷城教諭登成化戊戌進士授
禮科給事中論事不避強梗聲振鎖闥成化庚子汪
直用事立西廠密令左右親校覘察公卿以下官得
失輒注考語乘間聞奏或徑自捕繫考鞠內外恐懼
里巷細人爭詣廠污讎官吏機柄下移謁私門行苞
苴者益大起博上䟽論直盜弄國柄作福作威使君
相廢職漸不可長䟽入上令毀西廠直大恨之會北
虜寇雲中直與都御史王越保國公朱永受詔北伐
將團營軍五萬人出山後直乃奏用博紀軍功陰欲
中傷縉紳危之博曰論諫吾職也榮辱生死命也將

安避乎遂行旣抵雲中虜勢猖獗每出戰輒令紀功
官隨行管博雖書生意氣峭拔兜鍪繡襖彎兩石弧
馳突萬衆間如健將時或聚議機務益侃侃雄辯指
畫利害不少挫衄直始心敬之越亦從旁時時救護
得不死師還論功陞山西按察司僉事博旣禁閹舊
臣又襟韻䟽暢居法司鬱鬱不得志會當道時欲有
所指撻遂乞致仕還鄉里茅茨蕭然未嘗有戚色日
役蒼頭課田園或遇故人賓客觴咏不倦凡仕宦至
景州者猶時時勞問弘治甲子知州馬某貪虐毒民
博累言之不憚反以事見侵博發憤詣京師論其罪

惡及人命十餘事得賜詔獄問且遣使者詣州覈實
知州度不可解乃佯爲謝罪置酒毒死聞者莫不憤
歎初博且死囑其夫人曰吾以孤直不容於朝幸奉
先人之業得休息田畝教誨子弟百無所恨今乃爲
羣小所害命也夫我死勿埋吾屍庶幾朝廷覺悟得
爲百姓除暴去亂吾且含笑地下矣遂死馬後竟伏
誅博爲人卓犖開爽有古國士之風然慮事不欲太
深又不設城府故始以此立節中以此去位終以此
致死焉

張泰

張泰字世亨肅寧縣人成化戊戌進士授鄒平知縣
敷政愷悌不尚嚴刻民多宜之以行取擢陝西道監
察御史在道不爲奇絕之行而所守亦無物議弘治
初歷陝西副使進按察使十四年陞河南右布政丁
憂十七年起復補山東右布政十八年陞陝西左布
政使正德元年陞都察院右副都御史巡撫陝西泰
在陝西最久歷臬藩以至巡撫俱能確守官箴三年
遷大理寺卿時逆瑾竊柄泰不爲忤然確守自全不
入其黨五年遷刑部左侍郎六年陞都察院右都御
史總制陝西三邊軍務行部過蘭疏西郭故道以興

水利復開小渠以利城居者餘悉由東郭出以達於
川甫彌月隍塹週滿人沾其利八年卒於固原贈刑
部尚書

戈孜

戈孜字勉學景州人登成化戊戌進士授戶部主事
督賦山東尋擢郎中督儲大同首革宿弊謀利者忌
之弘治戊午竟以謗謫守鄜州政平訟理尋遷廉州
知府以理繁治劇之才處遐荒猺獞之地綽有餘裕
能聲大起戊午丁內艱歸已未以疾卒

李棨

李棻字從質任丘人父溥贈官光祿寺丞邃于易學
歷湖蜀秦魯間多所造就棻生而凝重簡靜因以易
授棻棻補縣學生提學閩御史禹錫重之試必居首
從游者至四十餘輩任丘士多業易實自棻始成化
甲午舉京闈戊戌登進士知上海縣賦訟叢沓持以
鎮靜和而不狎每有鞫問人稱爲明以外艱去民遮
道攀送有下泣者服闋被徵復以內艱去服再闋擢
光祿丞弘治壬子遷少卿南京工部解 御膳供應
物至卿胡恭者以鄉人不爲檢視典守者因出空文
後事覺恭坐貶連引諸僚佐棻以丞時事出同知青

州府家人咸怨恭絜曰命也會二弟連喪曰此亦恭
耶又六年戊午擢知萊州府值歲屢歉撫煦凋瘵理
疆界均力役捕刼盜六千餘人時勾稽屯地戎衛欲
移患于民或議牧馬于萊又有獻地衡藩者皆力爭
以免招徠流徙與屬縣期約視多寡爲殿最旬月內
復業者至數千人民稍饑輒發粟施粥活者尤衆暇
則修葺學舍集諸生勵以行業萊人爲刻石頌德焉
越八年不調絜以子時已舉進士爲翰林編修乃上
疏乞歸吏部言其恬退可嘉宜進秩以示勸特陞山
東布政司右叅政致仕越二年卒絜夙敦孝慕每見

儒官輒加禮遇曰吾父嘗爲是也父所遺田宅悉讓諸弟羣從子女皆爲婚嫁處已慎密澹然無所利有治事才而爲寬厚所掩又耻自衒故鮮有知者後時入內閣贈槩如其官

郝 鑑

郝鑑字廷重先世長安人先世名濟賢者爲河間路總管子孫遂居河間祖祥官思南府知府有善政鑑幼好學誦習舉子業雖貧益勵鄉人徐佑鄉薦回同學者皆避去鑑獨具幣跨驢迎之成化癸卯領順天府鄉薦甲辰登進士第授天長知縣民有貸而不償

者誣券爲僞乎于庭鑑曰吾倦且休矣取其券令畫字封而去鑑閱券字無異詰之曰券字非爾手筆耶誣者愧服民不知種麥鑑給種教之麥乃大穫至今天長有麥以檄理鹺政于儀真平心處之無不稱便弘治辛亥遷南京雲南道監察御史丁內艱服闋改南京廣東道巡視南京諸衛倉場搜姦剔蠹人皆憚之奉勅清戎躬閱故牘積歲隱沒之弊多所釐正大司馬馬公嘗謂鑑曰聞君清戎數增于舊而人不寃行將上君績于朝以勸天下之理戎政者又命巡視鳳陽等府貪吏望風解印上䟽欲起用致仕尚書秦

公紘爲朝論所稱壬戌遷慶陽知府慶陽邊郡久不治民多穴處不知桑麻鑑至則革吏胥之奸宄徵輸之弊百事一新且招工陶瓦甃治屋廬教樹藝暇則飾公署學校民有殺人報父仇者鑑據法當赦憲司不從後臺議卒是之鑑治爲諸郡第一正德丙寅卒年四十有九鑑孝友剛直尚節槩恤故舊事親曲盡奉養之道處兄弟友愛獨至登第後盡以祖遺田宅與之同年主事蜀人盧錦與中貴人構隙坐廢道遠不能歸鑑時尹天長適至南都見之遂與同舟至縣僦屋居之遣邑子弟穎秀者從之游擢士人女爲之

伉儷在慶陽宗藩若邊將以綿帛餽者一無所受鑑
居家二十餘年仕至郡守俸祿之外一無所增教子
以讀書爲事卒之日貧無以爲葬時總制楊公知鑑
爲深令有司厚賻其喪而歸之

邊憲

邊憲字汝成別號桂巖世家河間之任丘祖永歷官
戶部郎中父鏞累官至南京刑部右侍郎憲甫十歲
能爲韻語書過目輒成誦既長學於少傅邃菴楊公
每期以遠大成化癸卯舉于鄉明年登進士授青州
府推官時甫弱冠人皆以少易之憲發奸讞獄如老

吏郡中無不畏服者青濱海海溢壞民田廬將及城
憲率衆築隄障之城中人恃以無恐值歲饑議賑撫
按以其事屬憲憲計口給食處之有法所全活者甚
衆又屬憲均六府之役其輕重盈縮一視貲之高下
里書莫能售其奸民皆便之弘治癸丑擢湖廣道監
察御史奉命按山西復按宣大所在別白賢否裁抑
貴勢風采凜然陳邊務數事皆爲 上所嘉納又奉
命至遼東覈實邊儲諸宿蠹剔抉殆盡兵出宣大受
紀功之命人不敢請寄冒賞比還陞淮安知府以父
憂歸服除改鳳陽不兩歲積備賑之米至萬餘石正

德丁卯陞浙江按察司副使時逆瑾竊政欲士夫阿已往往假他事羅織爲罪而罰米以困之憲所罰至二千餘石竟不肯少挫庚午陞按察司使尋陞布政司右布政辛未陞都察院右都御史巡撫山東畿甸賊流入內界憲遣官分禦多所斬獲嘗荷勅獎勵且有金帛之賜明年賊勢益熾至命近臣統諸將以邊兵剿之師久無功言者請罪一二重臣以示警憲與保定巡撫蕭翀俱就逮繫獄旬歲賊平始得釋以舊職謝病家居處之恬然未嘗有怨甲戌復起巡撫寧夏至則築垣塹蓄芻糧凡邊備罔有不飭嘗禦虜花

馬池斬馘若干虜遭挫衄而遁又禦之紅兒山五日
七捷事聞獎賚有加丁丑陞南京刑部右侍郎己卯
改戶部右侍郎以母憂歸服除以舊官總督太倉疏
漕運數事未幾轉左蒞部事乃南遷尋復有中臺之
擢甲申年六十有一而卒憲資稟篤實容觀簡重孝
友爲鄉邦所稱有時鮮必薦然後入口母老失明左
右扶掖未嘗少離兄弟七人家居時日聚飲食遇親
友恩禮曲至口未嘗及人過失人有犯亦不與較居
官清慎嚴取與夙夜奉公蓋邊爲河間望族相傳漢
有司馬者其冢至今猶存入國朝累世爲名臣世卿

可謂盛矣

周郁

周郁字文盛號東陽阜城人戶部員外郎全之子登進士累官南京戶部郎中性敏而識高氣剛而行方往來京師未嘗持書幣履權貴門以是不調官者十餘年後時相中以他事陞陝西行太僕少卿始至卽上章劾退軍職不法者十四人又明年劾退九人皆竦息不敢犯弘治癸丑又劾苑馬司少卿某贓私不法事十餘條時巡撫都御史某以太僕苑馬班行而叅奏不關白于已謂郁紊亂舊規勒令致仕

李旦

李旦字啓東獻縣人頤身玉立磊犖不羈藻思迅發由進士任刑部主事成化末上奏修人事以謹天戒凡十事其一正君心以培治體大略謂陛下欲求正理先辟邪心如神仙佛老之說燒煉脩養之術私外戚納女謁聲色貨利奇技淫巧之屬皆陛下素所溺惑者也加以宦官宮妾左右近習有欲苟慕富貴覬保身家而誘之以蕩上心逢君意則以物交物以非遂非心能正者幾何繼自今務養心以正制心以理異端罷而不談脩煉置而不講聲色不邇貨利

不殖外戚不私女謁不行奇技不尚淫巧不作而便嬖倖臣擯斥之驅逐之日進儒臣講求治道大開言路款納忠良然後此心不爲彼所動而正大光明之體不失矣二曰篤恩義以親宗族三曰收宦官以重任使四曰惜名器以杜僥倖五曰絕珍玩以遠盜臣六曰別賢否以隆治效七曰撫流民以弭大患八曰恤畿民以固國本九曰整邊備以固藩籬十曰納諫臣以施實政凡此俱切於君身裨於治道者䟽入貴戚權倖側目竟坐是罷黜君子惜之

鄭宗仁

鄭宗仁字體元其先河南祥符人曾祖輝徙任丘遂家焉宗仁生而慧悟年十一補縣學生隣有爐從地躍起盤旋人恠之宗仁至輒墮或曰是豈凡子哉成化十六年舉鄉試魁二十三年第進士擢戶科給事中弘治二年奉勅覈薊州邊儲薶姦剔蠹人咸畏焉巡視光祿寺疏陳節供應專任使實邊儲汰冗食四事五年天下郡縣以災告者百九十餘處宗仁疏請賑卹明年災倍於前復疏言之有建議者以國用不足欲令齊民得入粟受千百戶仍帶俸宗仁曰名器濫至是耶此令一下軍士將解體况一時所得不

足償帶俸之費抗疏言之復上崇聖學嚴考察理冤滯三事多見采納晉尚寶司丞十七年轉南京太僕寺少卿疏陳馬政四事深切時弊正德四年改太常寺少卿明年晉南京太僕卿尋改北奏增庫官一員典錢穀六年改光祿卿時權奸用事費出無經宗仁據弘治初元供應例日省百金上偶幸光祿寺樓宗仁承命進芽茶等物僚屬少之且虞得罪宗仁曰有罪在我或傳上且去笑爲節儉管家云七年擢都察院右副都御史提督鴈門等關兼巡撫山西始至訟者二千餘人宗仁令各以情言不者辜而遣

之遠邇肅然出路引若干下之郡邑每引令人粟四斗得至千萬餘石 宗藩缺歲祿宗仁奏以粟募人取鹽於河東運司正額外得鹽二十萬引與商易芻粟以給邊令民以歲租折銀以給宗藩人以爲便孟縣礦賊千餘人流劫村堡宗仁檄鴈門寧武兵合民兵捕之斬首二百級擒其首惡餘黨悉降有欲以捷聞者宗仁却之各關缺馬宗仁市千三百餘匹復請太僕寺馬三千分給軍士仍時廩犒禁侵牟於是軍士欣躍復伍者二千餘人偏頭關西北二百里許曰草梁山有甘泉甚美虜恒恃以牧馬間爲抄掠宗仁

令以毒藥置泉水中寧武城北山險虜每據之瞰我
堅脆宗仁益以雉堞又于沿邊坎地爲窖增於舊者
十五虜知我有備邊患稍息居一年民隱吏治利害
有當興革者輒疏言之其更將領裁冗官建學校諸
疏俱報可九年召爲戶部右侍郎提督倉場明年監
通州水兌陳六事十二年宣大二鎮奏虜且近邊
命兼左僉都御史往督軍餉未幾 帝幸宣府又幸
大同宗仁從十五騎先驅會計芻粟三晝夜冒險行
六百餘里抵懷仁是夜凡五嘔血以應州之捷 賜
蟒衣三襲廕一子錦衣衛百戶世襲宗仁辭且乞休

不允十六年奉 懿旨迎 世宗于新鄉扈從至真
定犒之羊酒至良鄉饋之盤食 登極後降 手勅
進一品俸 賜金幣尋進尚書仍總督倉場漕司故
有折耗銀四十七萬餘兩多爲典守者所侵宗仁置
綱司簿稽之嘉靖元年十一月卒得年七十有二訃
聞 命禮部諭祭者再工部營葬域宗仁爲光祿卿
時廷鞠逆瑾事瑾厲聲曰内外文武皆出我門下惟
田尚書鄭光祿無私謁又何問時諭偉之 武帝駕
出宣大宗仁迎於鷄鳴驛中官欲以戎服見宗仁曰
君臣禮不可褻竟以品服謁之因面啓回鑾退復上

疏切諫其正直固如此

王 濟

主濟河間人成化丁未進士任戶部主事早年才智過人博學好問動遵禮法居官以清慎自持陞山西布政司叅議擢太僕寺少卿以得罪內臣劉瑾繫獄卒卒之日家無餘積 朝廷特賜祭以表其忠焉

馬思聰

馬思聰字彥誠青縣人學醇行端天性孝友以丙午舉人授陽谷縣令有廉能名時張秋河決檄令督工作堰功垂成以過勞瘁卒於工所百姓奔哭如喪考

妣至今思之

廖紀

廖紀字廷陳別號龍灣世居閩父瑄商於東光因家焉紀幼有至性好學不喜嬉飲成化庚子領京闈鄉薦庚戌舉進士時屠公總憲風裁炳著少許可紀觀政屬下獨器重之逮握銓柄首䟽紀爲考功主事紀亦節介不渝期副所薦鄉人有圖仕者奉贄干謁紀不辭旣乃完璧充贐以歸其清而不激類如此歷遷考功郎中再轉文選雅不阿時宰士類高之陞太僕少卿太常卿皆有實政紀錄尋權工部右侍郎督理

易州山廩時歲羨餘將萬金紀一無所染悉以 上
供因定爲例陞吏部左侍郎旣而擢南京吏部尚書
頃又轉兵部叅贊機務凡勢權所役奪之俾盡還伍
戎政用肅因人言求退章再上獲允家居踰兩載起
爲吏部尚書紀感激益自磨淬值修 獻廟實錄受
命總裁事竣進太子太保 賜鞍馬金幣丙戌請老
上不奪其志加少保給人夫月糧以示優遇仍

勅乘傳歸旣抵家日惟杜門研索古義嘗著庸學論
孟管窺少業毛詩晚年尤嗜易紀卒贈少傅謚僖靖
賜祭九壇 命工部管葬 恩禮稠至士林榮之

屈伸

屈伸字引之號螻菴任丘人弘治初進士選翰林院庶吉士時上初元新進紛紛大言沓撓新政伸每聞輒領之及爲禮科給事中同列蚤夜伺揣有封事顧寂不動一旦脫然勸御日講謝游觀曰是大繫世故吾何可無言遇災異置其苛細條興利除害數事下禮部議倪文毅公歎賞卽是其議以覆崇王就藩父太皇太后憶及言於上擬發使召至京師大臣臺諫力諫不得伸以輕離封守一語寤上立止其使自禮科陞兵科右給事中又轉吏科遂陞兵

科都給事屬虜大舉入寇首將提兵至榆林以虜退聞虜實自它道入內地張甚而永順宣慰彭某黠酋也幸有急興事上言欲帥所部入助戰伸謂同列曰是關國體也乃劾將帥逗遛請降詔責之而駁某無勞遠方助順詞婉而厲將帥懼至擣虜巢以勝奏凱歸而四夷亦由是絕他覬將家子聚麀禡職者攀戚畹謀復起而越人呂紀者畫工也暨一二兵官相繼內降注授要職伸大憤次第率言者排之最後鎮守河南太監劉瑯請柴夫舊制柴夫者名爲夫實入銀于官以備爨薪者而數則視其官之品中官例無之

而瑯請至四倍於尚書伸乃獨言祖宗制柴夫爲庶
官養廉助爾中官無當得之例 上爲殺其半朝野
悚息交以爲賀居禮科凡兩使而兩廣之役則人多
以貴戚憚行者伸毅然請往至則挺與奧援敵卒直
尚書秦公之誣積獄遂解居兵科一同考禮闈所得
多名士會權幸爭長進用上章切言觸犯忌諱逮捕
繫獄而讜直愈堅賦詩自解曰七年常愧此言官萬
死于今豈憚難此舌料應終在口歸來何必要妻看
其忠貞類如此嘗書座右曰富貴自有定分世有奔
走而得者不過一二不得者千萬以一二之故至于

勞心費力死而無成者多矣觀此則生平品節可知
疾革士夫問者諄諄談國事了不及私語卒之日不
能備棺歛惟書二籠藥瓶二隻故衣數件而已伸歷
諫垣十五年所上四十餘疏每一疏上 孝宗歛容
敬憚之故時稱善治功居多諸縉紳咸爲文哭之積
成巨卷

李 咨

李咨字汝弼故城人少警敏不凡嘗從鄉先生東田
馬公夫祿學易館一女巫家巫欲與人私思以計去
乃夜作巨人跡怵之復誘以嫠婦夜奔咨嚴呵拒之

最後又飾少女如嫠奔狀屹不動巫計窮咨亦知其意遂徙去鄉人以是稱之舉辛丑進士授襄陵令值歲大歉民流離不相保幼穉之棄滿野咨遣收孤兒數百日給薪米俾不乏有疾輒遣醫胗療之隣縣就食者日數百人其愛民類如此改治丹徒政治大敷如其所以治襄陵者未幾以薦陞監察御史去之日小民號泣遮道請留爲御史正色立朝務持大體未嘗訐以爲直嘗按河南河南竹根山賊董宦陳州豪民劉幹怙惡人莫敢撻靈寶諸山礦砂可盜取者互相讐殺時號三害悉除之民庶歌焉子獻可際可俱

進士

沈冬魁

沈冬魁字伯貞號立齋又號漳涯其先吳興人也至大父徙居阜城冬魁蚤舉順天鄉薦登弘治庚戌進士授中書舍人歷稽勲員外郎郎中擢順天府丞起艱太常少卿轉光祿太常卿左副都御史巡視河南入爲工部右侍郎總理易州山廠尋改戶部復爲工部遷南京禮部尚書居五年致政上嘉重之錫月廩歲役冬魁生而穎特甫澡髮人見者業以非常目之六歲卽能讀父書屬對應聲時時作警語隨父省

墓歸安年始十一凡道所經歷山水形勝州邑名理略能憶誦之父喜曰兒能若是辨乎乃使就學鄉先生鄉先生大加珍器登第授官中書纂修會典及孝廟實錄俱預有勞其爲光祿貶裁浮靡供億有藝疏節省事宜中時弊上曰光祿卿議是其聽裁損焉巡撫河南至則先條列所欲興革摘示之河南榜示無不帖服以爲真都御史云指揮石姓者素豪挾貲倚權璫爲暴冬魁發其奸并劾權璫中右權璫加旨詰責甚峻冬魁曰都御史固知有法終不阿中旨脫有罪督捕嵩廬盜盡平之捕鄆城盜又平之濠庶人

嬖逆西江變告冬魁防禦繕績尤悉中州無恐雖不
遇變而策略預遠矣易州故利府多豪猾中官乾沒
漏削至不得有所詰問或操繩約急輒訕構橫發冬
魁曰豈有爲天子操法明利復能顧刺譏者耶竟滌
理之舊常虧公帑賄內貴積漸已久冬魁獨以廉正
自持一無所賄滿九載考加俸二級勅吏部記其勛
尋有南都之命冬魁已絕意仕宦歎曰吾年望懸車
乃復顧戀不能引決乎累疏乞休予告家居每延戚
舊行酒賦詩鼓琴瑟甚歡鄉人忘其爲禮部尚書云
性孝友執喪中禮家故有產業盡舉以與弟恂恂夷

雅見者咸慕悅之至秉權蒞事卓乎不可誘奪沒前數日自制年譜屬子以後事而卒

房瑄

房瑄字廷獻號西莎任丘人弘治庚戌進士授刑部主事典內藏中貴專利給事中胡易疏發其奸上怒下獄瑄獨抗疏申究並劾太監韋太尚書白昂比黨亂政士論譴之歷陞河南按察使累著聲績仕至太僕卿

鄭璠

附弟珩

鄭璠字廷瑞別號阿陵其先世爲廣東高安人至大

父始徙任丘璠方孕時其母夢異人以犢角馬蹄磨身牛尾書其門覺而璠生自幼以穎異聞淹貫羣籍弘治壬子中順天鄉試明年登進士出知吳縣下車卽有能名中使道吳知其不可犯例給外一無所索或冒貴戚來謁勢張甚發其奸并餘黨擬配朱氏子以販漆富謀殺弟母曲庇之官數易弗得其情御史以屬璠夜夢所殺來愬語含糊莫辨似謂其嫂氏兄子害之璠曰是必斷其舌矣明日使人抉其口驗之果然獄遂成御史神之邑五萬戶其貧富璠輒知之及定役叅之里甲不數日而竣無以不均愬者閭門

富室沈甲規避重差詐爲懸鶉狀匍匐庭下璠曰若
顧欲欺我若嚮嘗紈綺而嬉於市謂我不能記乎遂
惶懼自占上戶蓋璠嘗一見之遂不忘其聰明識事
類如此在吳八年奏蠲洞庭荒山之稅六千三百石
梁西成之渡疏普安歸涇之壅皆便於民闢學宮建
社學公署壇壝祠宇鉅麗皆加于故以忤權貴僅轉
徽州府同知暨至徽值大司馬彭公方典郡一見莫
逆疑牒輒移決焉武弁之獄恃貲多數年不決及璠
至乃決郡俗送葬輿馬咸辦自喪家貧者病焉寧緩
葬至有三喪弗克舉者璠以禮刻期諭戒踰月葬者

萬計壬戌進表入京故事率挾當輸之稅利其羨爲道里費凡數百金璠却之道聞父憂歸終喪改金華俗罷訟璠嘗署篆郡庭聞然中人家以厚嫁破產故女多不育璠嚴諭之屬縣蘭溪民居櫛比素弗戒于火乃拓其衢率五門潄水一甕自是不復延燒邑人因命曰鄜公街正德丁卯以母憂歸終喪改河南府初河南有督驛傳馬價於吳者鄰盜竊其百金易以磚櫝封如故罪其主且逾歲璠驗諸鄰竈有取磚故隙與所櫝封者合盜遂服嘗署篆事辨治如金華辛未擢守瑞州府時盜魁陳福一等塞華林擁衆來犯

璠親環甲冑登譙樓禦之毒矢雨下殪三十餘人賊縱火且逼樓璠籲天風反賊乃退追數十里多所擒獲總制都御史陳金奇之上其功嗣是築城浚隍爲固守計又于治東阜建明遠樓演武亭以時訓練嚴賞罰勁卒日多壬申六月率衆薄華林分令僚屬營於渚嶺檄鄉人隨城地分戍適獲賊諜斬以徇仍焚近山之積聚賊大懼乃分寨瑪瑙山仙女嶺璠復攻圍之擒斬無算福一等窮蹙率妻孥降璠卽遣降者攻其餘孽而陳於其後鼓行而前連大捷蓋大小百餘戰璠濱於死者至再僕勤竟死之時饒之姚源盜

方熾提督都御史俞諫又檄璠往剿璠提兵夜入三十里賊諜知曰瑞兵至矣相戒勿動旦日悉衆來犯璠揮兵奮擊斬首數百叅將桂勇與璠連營亦服璠之神速暨還瑞盜復百人挾異術撼衆璠殲之御史以聞 武宗降溫旨犒獎府面錦江春夏漲輒沒兩崖廬舍璠廉得其故以市河爲豪強所侵悉力浚之淹患遂絕飭新學宮創建書院延經師以課諸生置黠吏及奸民于理珥筆之風少衰乙亥考績北上亡賴子汪鳳等乘間縱橫璠旋悉磔于市逆濠以親藩怙寵朘削郡縣屬邑新昌劉氏以富聞濠利其財遣

校尉持僞券責償播密令抗而毆之一無所得乃譟而之璠愬焉璠曰彼敢抗親藩何有於郡吏耶某固靖民者華林幸輯而敢激彼使變乎濠聞恚甚欲致播以洩其怒璠峻絕不爲所動又喻衆賢者以非罪忤濠捕急連及姻友破數十家璠庇之獲免濠智竭不得逞乃嗾當道罷之璠曰吾活瑞百萬生靈功成身退抑復何愧當卧視此輩敗矣瑞民聞其去徬徨若失父母乃建祠肖像事之里居數年猶問遺不絕璠精于吏事而每以儒術綠飾彬彬可觀晚歸亦唯以觴詠自適性孝友終其身與兄弟相愛不衰仕宦

幾三十年未嘗厚自封殖與人交洞見肝膈而言議
爽邁風格出塵爲政主於愛民終於靡懈義所不可
甘與時忤不阿徇爲自全計故雖爲逆黨所中而君
子深惜之春秋僅六十有四弟珩字廷用登弘治己
未進士歷工部郎中平涼知府致仕嘉靖中奏舉修
河有功收入史館縉紳咸重之

張時叙

張時叙字九叙滄州人中弘治丙辰進士授浙江青
田縣知縣甫下車卽修文廟伯溫祠縣猾吏刁民革
頑服化布按二司所批詞訟常無虛日一訊立辦民

呼爲張青天陞兵部職方司主事管山海關到日卽
與守備太監誓曰禦暴而不爲暴凡往來客商聽其
所之纖毫不染卒時城樓星落如斗大其鐘自鳴至
今青田山海士夫經過滄州者羅拜墓旁

孫緒

孫緒字誠甫沙溪其別號也世爲東海人曾大父元
季避地來故城因占籍焉父振富而尚義鄉鄰賴之
舉火嘗以歲荒焚券里中父老爲相率立祠生祀之
前一日寢後忽產異花奇香襲人凡七日乃已緒生
而警敏異常五歲未能言嘗手書一貴字父見之喜

屢試弗爽八歲出就外傳能賦詩十七入邑庠聲稱卓然弘治戊午中鄉試第二明年登進士廷試二甲第一授戶曹主事辛酉火篩入寇遣朝臣往禦緒被簡改爲叅謀以行畫策售奇酌以權變總戎以下咸改容禮之是時許襄毅公爲戶侍每見緒輒咨詢歎賞事竣調稽勲主事鈞陽馬太宰深器重之癸亥丁外艱先是父病亟緒欲終養再具疏弗獲請乃微行歸省於私第數日還京將乞休而訃音至矣旣免喪復除原官未幾轉員外郎考功文選郎中時逆瑾嘗械繫某御史於市士夫莫敢申理者緒過而惻然因

諸瑾曲救得破械出浙江有褚知府者自知當免以
在勢者爲之地而懷金謁緒峻却之卒不以其事白
諸人及轉太僕少卿迎母于宦邸歲暮大雪日晏而
養具未備因婉辭以悅母心母喜曰惟願終始不渝
耳乙亥晉正卿時大司馬王德華交結錢寧勢頗張
移文太僕語涉不遜緒作書數之王引咎浙人胡逢
者隸知印緒見其少年雅秀教之讀書後舉乙酉鄉
薦胡感知遇至以父事之舊例太僕供邊騾以千計
歲久無用緒上疏罷其役先是淮安鳳陽諸郡饑饉
馬俱小弱緒察其故咸與交兌省費至萬緡民賴之

不破產者千餘家至過緒之里有醵金設醮爲祈福者南陵丞韓思義貪殘日著緒庭杖之而按以法思義席權宦張雄凡與思義素者皆爲之言雄亦托親信寇錦衣來致意皆不答會思義以病死雄以故勘誣緒乃繫御史臺閱月幸菴彭公力救還職雄乃矯報褫爲民世宗龍飛詔復太僕卿致仕家居足不及官府朝夕侍母愉愉如也母性嚴急或怒緒長跪暑月揮汗如雨遇初度愀然塊坐終日蔬食曰吾念母氏劬勞也母沒後築漢陰亭剪韭軒於陂東柳曲自署陂東居士跡入城市者歲不二三間招朋舊遊

樂累日夜不倦緒生而美丰神順身玉立鬚髯望之
如畫重交游慎然諾與人語必倒衷曲至於嫉邪惡
佞則又毫髮莫之假借然性慈惠雖草木魚蟲之細
罔不欲其生喜音樂生平不飲乃勸人飲則又弗之
厭也爲文響振漢魏雄視屈宋詩則冲淡含蓄浸浸
乎逼大雅矣博極羣書天文地理老佛醫卜以及國
家儀文典禮莫不洞究所著有沙溪稿四十卷無用
閑談十二卷蒙求族譜大學中庸放言易經奇語陂
東新論四書小說語孟毛詩尚書雜義各若干卷藏
於家遂菴公至評其作爲近代宗匠允哉嘉靖丁未

卒是夕有巨星隕於異隅其光如炬空中有聲如雷其異如此年七十有四

李時

李時字宗易任丘縣人弘治壬戌進士改庶吉士嘉靖三年進侍讀學士尋陞禮部右侍郎四年三月纂修獻廟實錄命時與吏部右侍郎溫仁和爲副總裁四月時言頃者仁壽宮災詔加修省然中外臣工未有以奉德意者議禮者幾於聚訟催科者甚於繭絲希進趨權倖之門在位乏羔羊之節習於世祿鮮克由禮抑於冤獄多所未伸邪正雜居名實未核凡

此皆足以召災致變而諸臣方且佞諛成風以言爲諱忠鯁之士有懷欲吐思及罪譴輒復中止乞廣求直言令指實敷陳以祛時弊章下所司尋轉左丁憂七年起戶部左侍郎復改禮部八年陞禮部尚書九年時議姚廣孝在文廟雖有帷幄之功而崇秩顯爵已償其勞今以削髮緇流配享太廟實所未安乞移祀大興隆寺從之十年加太子太保三月時言各處鄉試巡按不得收取遺才不得與主考較禮儀不得徇私聘取房考官從之會浙江巡按李佶請經房閱得雋卷仍發監臨叅閱公同去取時言若令叅閱

去取則失 祖宗糊名易書之法亦非救弊補偏之
初意 上深然之九月召爲武英殿大學士叅贊機
務十二年 帝幸南內召孚敬時等閱馬觀花賜蟒
服 上製古樂府七言二章命各和以進復同遊西
苑製七言五言各二章命和十三年五月 上幸南
內召孚敬時同閱青爵尊 賜扇及酒食復留閱
宣宗輿地圖詩及御和詩十四年三月復召同遊南
內時等各作奉制記樂賦以獻 帝亦作一詩命曰
御製記樂同遊命刊示羣臣本年加少保進少傅兼
太子太保吏部尚書謹身殿大學士十五年端午召

時同夏言郭勛泛舟西苑命蕩槳近龍舟被顧問賜
宴無逸殿翌日時等表謝以爲自宣宗賜蹇義同
遊萬壽山楊榮同遊西苑後追此乃再見云九月以
寶訓實錄成加少傅華蓋殿大學士十七年十二
月卒於官贈少傅謚文康

李銳

李銳河間人弘治辛酉舉人有孝行親喪廬於墓側
獨居三載悲動鄉閭嘗以易學教授生徒咸有成績
後任平陸安邑知縣擢平定知州俱多善政民咸思
慕焉

及宦

及宦世交河人家世力田至宦始振儒業補學官弟子駿駿有時名正德癸酉領鄉薦明年舉進士選授兵科給事中是時流賊掠畿甸甚熾都御史甯杲討賊無功宦䟽劾罷去乃後代者竟剪滅焉虜犯邊邊將失守言官多有論劾宦獨䟽倖門未杜債帥成風顧欲將才兵練是塞源而浚其流也人以爲確論嘉靖初奉 詔覈錦衣官校革冒濫者二萬有奇請托不行歷工兵二科左遷寧國府知府抵郡獨處齋閣日蔬食三日一肉訟庭如水市無赭衣隸人暇輒午

卧令鋤庭草而已賦民以寬簡教令先之隸無野跡
獄訟以清六邑大治會南京太僕寺議以他郡馬移
牧寧國輿情恂恂稱不便下令慰諭移文爲達其隱
事遂寢調守懷慶去之日民慟哭而送者聲振野至
今祠祀之尋以父喪歸終制補鳳陽遷浙江按察副
使巡視海道時海寇不靖宦督捕八十餘人中有有
力者媒孽當路事聞勒歸里聽覈覈明無他改除陝
西遷布政司叅政以母喪歸終制補湖廣遷山西按
察使右布政使轉左轄所至皆舉其職入爲光祿卿
未幾遷南京都察院右副都御史提督操江宦於江

防諸務既殫力修明乃又謂南人鮮精射者巡行諸部輒身先武弁督習之於是江淮之間臂弓腰矢者紛出矣 召拜戶部右侍郎轉左侍郎因病乞休特允致仕卒于家

邊億

邊億字本一號東瀛憲之猶子任丘人進士授戶部主事往密雲招商不畏權勢改兵部歷陝西僉事值安化王之變奉 勅撫輯寧夏諸郡賴以保全陞漢南兵備副使首飭軍務除廖曹鄢喻四巨寇中丞彭公奏 聞欽賞銀牌命服加俸二級蒞官凡二十餘

年至湖廣左叅政

劉綱

劉綱字克立號秋溪任丘人進士知屯留縣值歲歉民流綱至勞來復業者衆召入爲禮部主事館人索夷貨減廩餼綱悉革之疏陳處置夷情十餘疏皆蒙嘉納改刑部陞員外郎詔錄囚山東有一家死罪者三人綱憫之時旱焚香籲天曰斯人法當生天其雨乎明日果雨遂釋二人後出知西安府有巨盜行劫綱授方略斬捕數百人功上擢山西叅政卒

于大節

于大節字守正號北莊其先自進賢徙居任丘大節
少聰敏勤學舉進士授行人安置甘肅降夷夷不敢
肆或私貨中國子女責之立還擢御史巡薊州山海
關劾中官武臣曠職詔督責之出按大同劾去僨事
者萬全衛艱於汲乃命鑿井得泉迄今名于御史井
再巡湖廣悉心疑獄刑得不濫聞 京師地震上八
事忤中貴左遷鶴慶府推官報至無愠色從容賦詩
曰武昌城裏得文憑小小扁舟載我行莫訝滇池荒
服外版圖猶自屬 皇明值歲饑發廩賑貸俗不知
學選秀民補郡學弟子員時親指授勘夷獄諭以情

法竟息其爭陞四川僉事尋陞浙江按察使以目疾致仕復起按察山東剖決如流民賴以寧卒于官大節性溫厲篤于孝友方在泮有親喪不能舉者倡義士買棺助之時人謂其名字咸稱情云

馬政

馬政字公敏青縣人性穎悟博學能文登進士第授翰林檢討歷興岷楚三府長史善爲詩有魏晉以來風韻見人過惡輒面斥之不少貸然竟以峭直忤權貴致政歸雅好吟咏尋以疾卒 詔進朝議大夫鄉邦咸思慕之

牛鸞

牛鸞字鳴世獻縣人正德戊辰進士任益都令時劇賊劉六等轉掠山東躡曹濮蹂淄澠所過城邑望風奔潰獨鸞與樂陵令許忠節公達東西遙應屹若巨鎮鸞尤臨機設變出入鬼神號稱異特賊嘗縱兵圍城三匝鸞日夜距守賊歛兵退鸞曰此特自完計耳不一大創賊必復來乃駕子弟兵及諸亡命躡賊戰大王橋身被四矢扶創疾鬪賊遂大奔斬獲無算賊自是不復東矣事聞擢按察司僉事備兵青州尋遷副使仍理兵務嘉靖初顏鎮賊王堂豪俠好施聚衆

山谷每戰困衆脫之鸞挺身突入賊中賊覺鸞奮刃大呼賊衆披靡未幾就殄山西馬五寨賊首陳卿者據山作亂數年不靖鸞奉詔移兵平之卽其地建平順縣鸞累平劇寇聲望赫然而懷奇負氣不能泯忍爲詭隨態世亦以嫉鸞尋謝病不起終於家

殷尚賢

殷尚賢其先廬州合肥人洪武初始祖成隸籍宣武衛已而改隸安吉成子忠屢從戰有功由本衛百戶陞河南歸德衛世襲指揮僉事調天津左衛於是世爲天津仕籍云父健襲指揮僉事健卒尚賢甫七歲

倜儻不凡母馮躬勤養育俾有成立弱冠入鄉校修詩書俎豆之業有四方之志嘉靖乙未襲父職迨壬寅春守禦黃花等鎮改任天津右衛尋管本衛事撫按廉其忠幹每加推獎丙午秋用督撫交薦守備遼東寧遠移駐瀋陽陞山西都司僉書巳酉秋充遊擊將軍督軍駐延安內盜外訐四野洶洶遊擊爲一時創設兵皆市人不習練尚賢受命厲志忠武身先士卒嚴刀斗多間諜以哨虜情而叅以遁甲孤虛諸法用能屢殲黠虜奏凱廷下於是諸鎮之兵延安稱強焉時天子加意邊陲廣求將材以儲折衝之用尚

賢威名日盛本兵屢推轂壬子夏擢山西太原左叅將賜勅以往是秋分守大同東路路當虜衝而鐵裹門等口尤極邊隘虜騎時出沒士馬單脆物故每大半尚賢曰不遇犀革何以別于將邪益勵志奮謀務淨虜氛以報主上殊遇屢挫敵鋒斬獲無算時巡撫侯公在圍急甚尚賢督率前軍衝之圍遂解虜嚙指啗之功聞上嘉賞有加甲寅克分守遼陽副總兵尋陞都督僉事總兵官鎮守遼陽掛征虜大將軍印賜璽書寵諭備至尚賢尤感恩圖奮訓練六軍修繕墩堡申嚴號令由是軍威大振犬羊懷畏居遼陽

二月降者數百人聞有犯而侵境輒剿截沙磧無敢
牧馬捷書遞奏諸鎮聞風思奮而尚賢矢志益勵矣
丙辰冬虜騎數萬猝至士伍不暇行列尚賢聞之躍
馬而出血戰移日力窮矢竭遂遇害贈少保左都督
特進榮祿大夫仍廕一子世襲指揮同知命禮工二
部祭葬如例立祠以旌忠烈

戴才

戴才字子需別號晉菴其先景州人五世祖徙滄州
家焉才生而穎異沉靜始就外傳卽端重如成人年
十二試於郡郡守姚江吳公大奇之曰此公輔器也

聲籍籍起嘉靖癸卯舉於鄉甲辰成進士授行人已
酉擢戶科給事中庚戌之秋虜薄都城倉卒乏軍興
請一切加諸道賦才抗言今畿輔山陝諸郡歲苦虜
募兵市馬甚勞費矣而復議增馬江南諸郡每先期
輸納料銀又豫輸機兵民快皆目前權宜之計而復
議增賦是竭澤而漁以重困民也部議竟格不行已
巡視光祿清覈伏蠹修爲四事上之歲省大官金錢
十萬壬子轉吏科右給事癸丑轉左以內艱歸服闋
補工科左尋陞兵科都給事才以倭夷猖獗閩廣用
兵無虛歲乃疏陳三事曰亟剿滅慎防守馭客兵言

言中窾下所司行之才在諫垣不以鷹擊毛舉爲名
高然數引當否耻趨和承意久之陞南京太僕寺少
卿循行郡國精心牧政踰年以外艱歸服除陞都察
院右僉都御史巡撫甘肅甘肅新中虜無見車騎卽
羸卒乘亭障者半菽不給才至撫其瘡痍而乳哺之
首爲請帑餉墾荒田興水利乃次第簡兵將習技擊
飭烽堠虜入輒遭創去而紅柳林鎗竿嶺之捷甘鎮
向未嘗有也虜旣數不利遠塞則以其間建學明教
振廢省刑撫甘五年斬首捕虜數十百人修築墩墻
以千百計招徠降口若干奪獲羊馬器械無筭以積

勞晉副都御史巡撫陝西五郡父老及諸番夷卧轍
攀留才甫至陝有秋防之役卽移鎮原州儲芻糧守
要害比及瓜期旣撤防套虜忽入延綏殺總兵郭江
執副總兵時鑾以去科臣列失事狀嗣連才夫虜所
出入定邊瓦楂諸路非才所轄地言者誤及才不自
明也詔才歸就覈隆慶丁卯事白仍以原官巡撫河
南三月入爲大理卿己巳陞刑部右侍郎尋轉左才
再爲法官持法平允所定買休賣休諸律著爲令庚
午八月宣大總鎮臣以謀者言東西虜酋當大舉入
寇京師戒嚴 莊皇帝飭大司馬修戰守具詔諸鎮

整兵待援乃起前都御史帶川劉公守通州提督援兵而改才戶部左侍郎兼左僉都御史督餉事才言虜勢叵測徵發貴豫請令密雲諸處司計之臣悉心經畫益廣儲蓄俾應援兵馬在所關支如取諸寄此與輦輜重而勞軍者功相倍也旣而虜偵我有備旋解散去是年冬陞右都御史兼兵部右侍郎總督陝西三邊軍務才三蒞陝益熟其利弊舉劾諸帥咸當其人凡汰冗增餉議屯田鹽法檄鎮兵防禦諸路俱不遺餘力中衛南有裴家川地腴田可萬頃民苦虜不得田作才爲相度地形築牆建堡䟽於朝且請以

固原守備某督兵營田以死馬寺少卿兼僉事某移靖虜整飭兵餉而秦隴之間屹然成巨鎮矣會俺酋款關乞貢市報可而虜吉能者俺酋支屬也援例以請下才議才言東西虜各爲雄長授職宜均通貢宜隨俺酋進入爲便若互市則陝西重鎮旣不可招之內地甘肅開市已久又不宜令強虜混入以滋禍階惟延寧二鎮頗爲近虜然闌出之禁甚嚴亦不宜因市啓釁互市第可行之宣大不可槩陝西也有旨切責才才卒主延寧二市且疏改延綏市於紅山閘門之外復寧夏清水營舊廠以備不虞乞椿朋馬價以

充市本列卒環市以懾虜心故竟才蒞事無一敢譁
於市者尋進兵部尚書兼右副都御史總督如故兩
歲中白金文綺凡六錫焉繼命以原官掌南京都察
院事未抵任改南刑部又改兵部叅贊機務才按江
防緩急爲飭兵卒部署方略巡鹽御史某奏改浦子
口五衛隸御史節制才言南畿各衛分列六營以藩
籬根本統領則以內外守備巡視則以科道其來已
久一旦改隸御史使堂堂六師下同部伍非建制意
也事遂寢蓋才習掌故持大體時方倚爲重而俄以
繼妣憂歸矣家居久之撫按交章推轂而才顧以老

無意于世方才爭互市時或諷以第開四市如貴人
指延賞可立俟才正色曰市之利害籌之熟矣徇下
而謾上便身圖而不計國是有臣如此將焉用之謝
絕其人去才旣去鎮喜事者卒開甘肅之市令番夷
交惡爲國家生一邊隙蓋十餘年而才之言竟成左
券云才長身嶽立望者知爲正人君子居常恂恂飲
人以和至當大事決大議則天動星迴而不可奪也
性至孝居喪柴毀過禮甘恬澹薄嗜慾仕宦四十年
自奉甚約終其身無世俗聲色之好閨門養重無一
語撓守牧權亦無尺一走長安道中輿論高之萬曆

本朝分省人物志 卷六
丙戌卒年七十有三

湯 賓

湯賓字繼寅號交川上世爲楚齊安人有遠祖徙順義永樂間曾祖福春者始卜南皮而家焉賓方孕時其父夢一少年冕笏入戶賓遂生父通星學知賓大貴賓自幼穎敏殊凡兒書口授輒成誦屬對應聲而答皆奇麗驚人五歲時忽向翁前朗誦大學康誥章益奇之已而其翁授吳江丞賓時可八歲隨侍行道里二千而遙中所經行山川郡邑水陸交際下極媿瑣一一能舉其詳後治舉子業有名嘉靖庚子舉順

天鄉試至庚戌成進士母病篤賓侍湯藥目不承睫
衣不解帶者逾月晝夜焚香籲天願以身代而母病
竟霍然已人以爲孝感云初授安福知縣潔已愛民
劑量里甲其他平反疑獄保障流寇諸政事原本經
術士民戴之越三年轉戶部主事初權崇文門稅再
巡通州草場三轉邊鎮糧餉四督淮安倉政所至以
勤廉著聲尋轉員外郎中知萊州府事甫一歲而丁
內艱服闋補常州府常州爲東吳劇郡巨室大猾陰
持官府差繁賦重弊竇萬端賓明以察之寬以劑之
竟用治行高第擢湖廣按察司副使兵備蘇松蓋吳

人不能一日去賓也時當島夷兵燹之際賓外捍海岸內安黎庶其時開府大吏不問人情徑裁兵餉沿海無賴偶語市中謀鼓譟地方洶洶大吏聞之倉皇無措賓立召幕下開誠告戒許以括帑金爲餉而諸黨叩頭散去是年挑七府塘百里白茅河百二十里度地程工胼胝爲勞其心獨苦先是賓父丞吳江時曾濬白茅工未竟而賓卒成之人羨其父子有德於吳如此庚午轉河南按察使便道省親上九十壽鄉里以爲榮辛未轉湖廣右布政使無何再進左癸酉擢撫治鄖陽右副都御史賓領節抵鎮譏察山寇招

撫流移軍政修明地方寧謐俄以外艱歸幾不欲生
至乙亥以中讒言致仕賓旣襄大事橐裝如洗日惟
課農教子凡大夫有司之干旄並皆謝絕暇或羣一
二耆宿共話桑麻賓儀貌修偉內無城府與物甚和
而介然之守萬夫難奪萬曆十三年卒年七十二歲

宋 諾

宋諾字子重故城人生有奇質九歲能屬文甫垂髫
爲諸生其父從邑先達受經所聞師說歸以語之無
不解嘉靖乙丑第進士授戶部主事歷員外郎郎中
咸有能名同舍郎主藏有所亡失註誤及諾謫四川

忠州知州忠去長安幾萬里險遠矣諾慷慨叱馭往抵任五日召爲南京戶部員外郎未至擢爲郎中居無何以久次拜知東昌府視事五月以內艱去服闋除知鄖陽郎中丞薦其才堪治劇徙知河南視事四月聞父病甚卽解印綬自免去尋丁父艱久之部使廷臣爭上書言故河南守良吏以父故棄官其人才可用有詔起知兗州諾往居三府不甚久然所至廉平執法名聲流聞及守兗幾三年得盡其才治行愈著兗屬二十七城直兩京孔道吏初民敝徵發驛騷諾旣熟其利病務爲拊循安息煦以愷悌至所興除

鈎校無不精核卽有骯髒奸法輒繩以重典不少貸
吏兢兢奉約束母敢飾情以免部使上疏言究治狀
者牘相踵矣以入覲詣闕下而遽卒諸卿大夫無不
歎息者諾爲人儁偉玉立容貌甚修坦夷誠慤不爲
矯飾然亦彊直自遂卽於意不當未嘗少有所詘其
才博大通敏遊刃有餘論事衍衍洞於指掌然常本
人情無迂恢語未第時甚貧竭力奉親甘旨無缺及
後貴迎養宦邸朝夕侍食職事鞅掌終不少廢有同
胞三弟悉推父貲讓之子女婚嫁又佐以私財故人
子楊生孤貧召至家塾與子同業親督課之生後學

成爲名士他所周卹孤嫠尤衆

余繼登

余繼登字世用別號雲衢交河縣人生八歲而父母俱喪族人欲攘其業爭欲死之竟不死則厝薪其間而燔之火及門而燬復得不死自少醇篤喜讀書志意如成人十三補弟子員試輒高等族人始不復謀以萬曆丁丑成進士選翰林院庶吉士其學務考國家故實及前代治亂所繇在館局三年未嘗尺寸易其度癸未分校禮闈是年纂修會典丁亥會典成陞修撰賜白金文綺戊子使於周藩却餽遺無所受歸

渡黃河中流而舟膠波濤撼之柁折舟人皆泣具衣冠而禱曰予以使道於河逢神之怒舟膠不渡予小子之罪也以予小子故而至震驚龍節神亦有佚罰惟神實圖利之禱旣而波恬如或翼舟以濟已丑充經筵日講官 上久不御講臣子無所關其忠因以通鑑分類註解引古誼傳時政以獻治亂得失皆具陳其所以然或庶幾以三百篇諫言者亡罪聞者足以誠也辛卯留都主試壬辰陞右諭德典試武闈甲午陞少詹充正史副總裁修 武宗毅皇帝紀丙申大內火偕講臣上章引劉向不學道厥妖火焚宮以

諫是年擢禮部右侍郎戊戌充會試知貢舉官申飭
令甲加茲以三品滿課績最予三代誥命任一子國
子生陞左侍郎署部事自爲中允至今官皆兼日講
故在講筵最久獻納最多歲 賜白金文幣廷臣無
敢望焉已亥擢尚書值雷擊 太廟樹上言弭災以
實不以文今所謂修省皆文耳不 郊祀不 廟享
皇長子不婚不冠不冊立而礦稅日亟 祖宗寧
無望于 陛下乎霆怒氣也兵象也循理度勢恐有
窮苦之民弄兵潢池中者此時而泄泄循修省之文
欲以應變回天豈可得也是年秦晉齊皆地震南都

雷火西寧鐘不擊自鳴紹興地出血復上言四方所
報二氣舛錯之狀近歲未嘗有也天視聽寄于民今
畿甸郡國百姓苦于征調催權織造開採各欲以情
訴于上而不可得計惟有仰天而泣耳天不言故
以變異譴告之昔漢臣徐安以民困主不恤下怨上
不知爲有國之戒伏願以愛民實心爲應天實事罷
諸弊政不便于民者疏入上溫旨荅焉播州酋楊
應龍叛破綦江城徵諸路兵討之力請罷四川礦稅
以佐兵食寬民力不報九月太白經天道山崩湧出
土山五復上言天不和寒暑隔人不和贅疣生地不

和丘阜出方今星纏失度水旱爲沴太白晝見甚且
經天此天氣不和也鑿山開礦裂地求砂以至地不
能固脉而山崩金不能生水而川竭神不能奠維而
地震此地氣不和也閭閻窮困加以必不能止之誅
求帑藏空虛責以必不能辦之珠寶奸民蟻聚中使
鴟張世變如亂絲民命如累卵中外太隔上下不交
此人氣不和也戾氣凝而不散怨毒結而成形陵谷
變遷高卑易位是爲陰乘陽邪干正下叛上之象夫
羣臣者陛下子也臣子不能動君父言愈數愈厭
陛下者天之子也天以非常之變感悟陛下尚

可恬然不爲意乎始以貳卿署部事數月請 皇長
子選婚䟽凡九上及正席南宮䟽請建儲及行冠婚
禮者三與羣僚署名以進者五卽病肺咯咯不休猶
伏枕具䟽草以上每譚國事潸然流涕曰大禮不舉
禮官死不瞑矣庚子春 詔旨將有事於 東宮趣
禮部具儀時已瘠甚扶掖起視事已而病劇數乞歸
不允卒於官訃聞予祭葬加祭一壇贈太子少保謚
文恪性忠直有大臣之節善執持重許可一顰笑不
輕假人貴近無敢干以非法士大夫與語無敢及非
義僚屬有不當卽正色訶之終身不置姬侍不營產

業曾學士過其家茅屋數楹蓬蒿沒足歎息而去生平不受干謁亦不以一事干人次子道一累試學官皆見置楊夫人求爲之地曰子而才自當得之不才自當置之卽郡邑小試終不肯爲一言產旣薄又時分給親族比歲大侵傾廩以食之不給縻至就于京邸復分俸給之里人皆歎其貴而能貧貧而能賑人不可及也所著通鑑進講錄五十卷國朝典故紀聞十八卷行于世

本朝分省人物考卷之六